

四庫全書

集部

欽定四庫全書

集部

白氏長慶集卷二

詳校官監察御史_臣查瑩

檢討_臣何思鈞覆勘

總校官知縣_臣繆珙

校對官助教_臣卜惟吉

謄錄監生_臣袁瑩

御製讀白居易詩率題

立意為平易虞人不知叟千載誦其詩而叟亦知否

欽定四庫全書

集部二

白氏長慶集

別集類一唐

提要

臣等謹案白氏長慶集七十一卷唐白居易撰居易有六帖已著錄案錢曾讀書敏求記稱所見宋刻居易集兩本皆題為白氏文集不名長慶集汪立名校刻香山詩集亦謂寶曆以後之詩不應概題曰長慶今考居易嘗

自寫其集分置僧寺據所自記太和九年置東林寺者二千九百六十四首勒成六十卷開成元年置于聖善寺者三千二百五十五首勒成六十五卷開成四年置于蘇州南禪院者凡三千四百八十七首勒為六十七卷皆題曰白氏文集開成五年置于香山寺者凡八百首合為十卷則別題曰洛中集惟長慶四年元稹作白氏長慶集序稱盡徵其文

手自排纂成五十卷二千九百九十一首又
稱明年當改元長慶訖于是因號曰白氏長
慶集則長慶一集特穆宗甲辰以前之作曾
及立名所辨不為無據然唐志載白氏長慶
集七十五卷宋志亦載白氏長慶集七十一
卷而白氏文集之名轉不著錄又高斯得恥
堂存稿有白氏長慶集序宋人目錄傳于今
者晁公武讀書志尤袤遂初堂書目陳振孫

書錄解題亦均作白氏長慶集則謂宋刻必作白氏文集亦未盡然況元稹之序本為長慶集作而聖善寺文集記中載有居易自注稱元相公先作集序并目錄一卷在外則長慶集序已移并開成新作之目錄知寶歷以後之詩文均編為續集襲其舊名矣未可遽以總題長慶為非也其卷帙之數晁公武謂前集五十卷後集二十卷續集五卷今亡三

卷則當有七十二卷陳振孫為七十一卷之外又有外集一卷亦當有七十二卷而所標總數乃皆仍為七十一卷與今本合則其故不可得詳至彭叔夏文苑英華辨證謂集中進士策問第二道俗本妄有所增又馮班才調集評亦稱每卷首古調律詩格詩之目為重刻改竄則今所行本已迥非當日之舊矣乾隆四十四年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

白氏長慶集卷一

唐白居易撰

諷諭一

古調詩五言
凡六十五首

賀雨

皇帝嗣寶曆元和三年冬自冬及春暮不雨旱熯熯

持中

切上心念下民懼歲成災凶遂下罪已詔殷勤制萬邦

帝曰予一人繼天承祖宗憂勤不遑寧夙夜心忡忡元

年誅劉闢一舉靖巴邛二年戮李錡不戰安江東顧惟
眇眇德遽有巍巍功或者天降沴無乃儆予躬上思答
天戒下思致時邕莫如率其身慈和與儉恭乃命罷進
獻乃命賑饑窮宥死降五刑責已寬三農宮女出宣徽
廄馬減飛龍庶政靡不舉皆出自宸衷奔騰道路人偃
偻田野翁歡呼相告報感泣涕沾胸順人人心悅先天
天意從詔下纔七日和氣生沖融凝爲油油雲散作習
習風晝夜三日雨淒淒復濛濛萬心春熙熙百穀青茂

芄蒲紅切

人變愁爲喜歲易儉爲豐乃知王者心憂樂與衆同皇天與后土所感無不通冠珮何鏘鏘將相及王公蹈舞呼萬歲列賀明庭中小臣誠愚陋職忝金鑾宮稽首再三拜一言獻天聰君以明爲聖臣以直爲忠敢賀有其始亦願有其終

讀張藉古樂府

張君何爲者業文三十春猶工樂府詩舉代少其倫爲詩意如何六義互鋪陳風雅比興外未嘗著空文讀君

學仙詩可諷放佚君讀君董公詩可誨貪暴臣讀君商
女詩可感悍婦仁讀君勤齊詩可勸薄夫敦上可裨教
化舒之濟萬民下可理情性卷之善一身始從青衿歲
迨此白髮新日夜秉筆吟心苦力亦勤時無采詩官委
棄如泥塵恐君百歲後滅没人不聞願藏中秘書百代
不湮淪願播內樂府時得聞至尊言者志之苗行者文
之根所以讀君詩亦知君爲人如何欲五十官小身賤
貧病眼街西住無人行到門

哭孔戡

洛陽誰不死戡死聞長安我是知戡者聞之涕泣然戡
佐山東軍非義不可干拂衣向西來其道直如絃從事
得如此人人以爲難人言明明代合置在朝端或望居
諫司有事戡必言或望居憲府有邪戡必彈惜哉兩不
諧沒齒爲閒官竟不得一日蹇蹇立君前形骸隨衆人
斂葬北邙山平生剛腸內直氣歸其閒居顏切賢者爲生
民生死懸在天謂天不愛人胡爲生其賢謂天果愛民

金匱要略卷一
胡爲奪其年茫茫元化中誰執如此權

凶宅

長安多大宅列在街西東往往朱門內房廊相對空
梟鳴松桂枝孤藏蘭菊叢蒼苔黃葉地日暮多旋風
前主爲將相得罪竄巴庸後主爲公卿寢疾歿其中
連延四五主殃禍繼相鍾自從十年來不利主人翁
風雨壞簷隙蛇鼠穿牆墉人疑不敢買日毀土木功
嗟嗟俗人心甚矣其愚蒙但恐災將至不思禍所從
我今題此詩欲

悟迷者胸凡爲大官人年祿多高崇權重持難久位高
勢易窮驕者物之盈老者數之終四者如寇盜日夜來
相攻假使居吉土孰能保其躬因小以明大借家可諭
邦叶通蒙切周秦宅峻函其宅非不同一興八百年一死望
夷宮寄語家與國人凶非宅凶

夢仙

人有夢仙者夢身升上清坐乘一白鶴前引雙紅旌羽
衣忽飄飄玉鸞俄錚錚半空直下視人世塵冥冥漸失

鄉國處纔分山水形東海一片白列岳五點青須臾羣
仙來相引朝玉京安期羨門輩列侍如公卿仰謁玉皇
帝稽首前致誠帝言汝仙才努力勿自輕却後十五年
期汝不死庭再拜受斯言既寤喜且驚秘之不敢泄誓
志居巖扃消營切恩愛捨骨肉飲食斷羶腥朝飧雲母散
夜吸沆何黨切漚奚介切精空山三十載日望輜輶迎前期
過已久鸞鶴無來聲齒髮日衰白耳目減聰明一朝同
物化身與糞壤并神仙信有之俗力非可營苟無金骨

相不列丹臺名徒傳辟穀法虛受燒丹經只自取勤苦
百年終不成悲哉夢仙人一夢誤一生

觀刈麥

時爲盤屋縣尉。盤音周屋音質

田家少閒月五月人倍忙夜來南風起小麥覆隴黃婦
姑荷簞食童稚攜壺漿相隨餉田去丁壯在南岡足蒸
暑土氣背灼炎天光力盡不知熱但惜夏日長復有貧
婦人抱子在其傍右手秉遺穗左臂懸敝筐聽其相顧
言聞者爲悲傷家田輸稅盡拾此充饑腸今我何功德

曾不事農桑吏祿三百石歲晏有餘糧念此私自愧盡
日不能忘

題海圖屏風

元和己丑年作

海水無風時波濤安悠悠鱗介無小大遂性各沉浮突
兀海底鼇首冠三神丘釣網不能制其來非一秋或者
不量力謂茲鼇可求

旁註切

鼇

興計切

牽不動綸絕沈其

鉤一鼇既頓頷諸鼇齊掉頭白濤與黑浪呼吸繞咽喉
噴風激飛廉鼓波怒陽侯鯨鯢得其便張口欲吞舟萬

里無活鱗百川多倒流遂使江漢水朝宗意亦休蒼然
屏風上此畫良有由

羸駿

驂騑失其主羸餓無人牧向風嘶一聲莽蒼黃河曲蹋
冰水畔立臥雪塚間宿歲暮田野空寒草不滿腹豈無
市駿者盡是凡人目相馬失於瘦遂遺千里足村中何
擾擾有吏徵芻粟輸彼軍廩中化作駕駘肉

廢琴

絲桐合爲琴中有太古聲古聲淡無味不稱今人情玉
徽光彩滅朱絃塵土生廢棄來已久遺音尚泠泠不辭
爲君彈縱彈人不聽何物使之然羌笛與秦箏

李都尉古劍

古劍寒黯黯鑄來幾千秋白光納日月紫氣排斗牛有
客借一觀愛之不敢求湛然玉匣中秋水澄不流至寶
有本性精剛無與儔可使寸寸折不能繞指柔願快直
士心將斷佞臣頭不願報小怨夜半刺私讐勸君慎所

用無作神兵羞

雲居寺孤桐

一株青玉立千葉綠雲委亭亭五丈餘高意猶未已山
僧年九十清淨老不死自云手種時一顆

苦果切

青桐子

直從萌芽拔高自毫末始四面無附枝中心有通理寄
言立身者孤直當如此

京兆府新栽蓮

時爲藍屋縣尉趨府作

污溝貯濁水水上葉田田我來一長歎知是東溪蓮下

有清泥污馨香無復全上有紅塵撲顏色不得鮮物性
猶如此人事亦宜然托根非其所不如遭棄捐干權切昔
在溪中日花葉媚清漣今來不得地顛音樵頽音萃府門前

月夜登閣避暑

旱久炎氣甚中人若燔燒清風隱何處草樹不動搖何
以避暑氣無如出塵囂行行都門外佛閣正岿然清涼
近高生煩熱委靜銷開襟當軒坐神泰意飄飄迴看歸
路傍禾黍盡枯焦獨善誠有計將何救旱苗

初授拾遺

奉詔登左掖東帶參朝議何言初命卑且脫風塵吏杜
甫陳子昂才名括天地當時非不遇尚無過斯位況予
寒薄者寵至不自意驚近白日光慙非青雲器天子方
從諫朝廷無忌諱豈不思匪躬適遇時無事受命已旬
月飽食隨班次諫紙忽盈箱對之終自愧

贈元稹

自我從宦遊七年在長安所得惟元君乃知定交難豈

無山上苗徑寸無歲寒豈無要津水咫尺有波瀾之子
異於是久處誓不諼音無波古井水有節秋竹竿一爲
同心友三及芳歲關花下鞍馬遊雪中杯酒歡衡門相
逢迎不具帶與冠春風日高睡秋月夜深看不爲同登
科不爲同署官所合在方寸心源無異端

哭劉敦質

小樹兩株栢新土三尺墳蒼蒼白露草此地哭劉君哭
君豈無辭辭云君子人如何天不弔窮悴至終身愚者

多貴壽賢者獨賤述龍亢彼無悔蠖屈此不伸哭罷持
此辭吾將詰義文

答友問

大圭廉不割利劍用不缺當其斬馬時良玉不如鐵置
鐵在洪爐鐵消易如雪良玉同其中三日燒不熱君疑
才與德詠此知優劣

雜興三首

楚王多內寵傾國選嬪妃又愛從禽樂馳騁每相隨錦

鞬

哥誦切

臂花隼羅袂控金羈遂習宮中女皆如馬上兒

色禽合爲荒刑政兩已衰

思誰切

雲夢春仍獵章華夜不

歸東風二月天春鴈正離離美人挾銀鐫一發疊雙飛

飛鴻驚斷行斂翅避蛾眉君王顧之笑弓箭生光輝迴

眸語君曰昔聞莊王時有一愚夫人其名曰樊姬不有

此遊樂三載斷鮮肥

越國政初荒越天旱不已風日燥水田水涸塵飛起國

中新下令官渠禁流水流水不入田壅入王宮裏餘波

養魚鳥倒影浮樓雉澹灩九折池縈迴十餘里四月芰
荷發越王日遊嬉左右好風來香動芙蓉葉但愛芙蓉
香又種芙蓉子不念閭門外千里稻苗死

吳王心日侈服玩盡奇瓌

音回又姑回切

身臥翠羽帳手持紅

玉杯冠垂明月珠帶束通天犀行動自矜顧數步一徘徊
小人知所好懷寶四方來奸邪得藉手從此倖門開
古稱國之寶穀米與賢才今看君王眼視之如塵灰伍
員諫已死浮屍去不迴姑蘇臺下草麋鹿闇生麕

宿紫閣山北村

晨遊紫閣峯暮宿山下村村老見予喜爲予開一樽舉
杯未及飲暴卒來入門紫衣挾刀斧草草十餘人奪我
席上酒掣我盤中殮主人退後立斂手反如賓中庭有
奇樹種來三十春主人惜不得持斧斷其根口稱采造
家身屬神策軍主人慎勿語中尉正承恩

讀漢書

禾黍與根莠雨來同日滋桃李與荊棘霜降同夜萎草

木既區別榮枯那等夷茫茫天地意無乃太無私小人
與君子用置各有宜奈何西漢末忠邪並信之不然盡
信忠早絕邪臣窺不然盡信邪早使忠臣知優游兩不
斷盛業日已衰痛矣蕭京輩終令陷禍機蕭望之京房等每讀
元成紀憤憤令人悲寄言爲國者不得學天時寄言爲
臣者可以鑒於斯

贈樊著作

陽城爲諫議以正事其君其手如屈軼舉必指佞臣卒

使不仁者不得秉國鈞元稹爲御史以直立其身其心如肺石動必達窮民東川八十家冤憤一言伸劉闢肆亂心殺人正紛紛其嫂曰庾氏棄絕不爲親從史萌逆節隱心潛負恩其佐曰孔戡捨去不爲賓凡此士與女其道天下聞常恐國史上但記鳳與麟賢者不爲名名彰教乃敦每惜若人輩身死名亦淪君爲著作郎職廢志空存雖有良史才直筆無所申何不自著書實錄彼善人編爲一家言以備史闕文

蜀路石婦

道傍一石婦無記亦無銘傳是此鄉女爲婦孝且貞十五嫁邑人十六夫征行夫行二十載婦獨守孤熒其夫有父母老病不安寧其婦執婦道一一如禮經晨昏問起居恭順發心誠藥餌自調節膳羞必甘馨夫行竟不起婦德轉光明後人高其節刻石像婦形儼然整衣巾若立在閨庭似見舅姑禮如聞環珮聲至今爲婦者見此孝心生不比山頭石空有望夫名

折劍頭

拾得折劍頭不知折之由一握青蛇尾數寸碧峯頭疑
是斬鯨鯢不然刺蛟虬缺落泥土中委棄無人收我有
鄙介性好剛不好柔勿輕直折劍猶勝曲全鉤

登樂遊園望

獨上樂遊園四望天日曛東北何靄靄宮闕入烟雲愛
此高處立忽如遺垢氛耳目暫清曠懷抱鬱不伸下視
十二街綠樹間紅塵車馬徒滿眼不見心所親孔生死

洛陽元九謫荆門可憐南北路高蓋者何人

酬元九對新栽竹有懷見寄

項有贈元九詩云有節秋竹竿故元感之因重見寄

昔我十年前與君始相識曾將秋竹竿比君孤且直
中心一以合外事紛無極共保秋竹心風霜侵不得始
嫌梧桐樹秋至先改色不愛楊柳枝春來軟無力憐君
別我後見竹長相憶長欲在眼前故栽庭戶側分首今
何處君南我在北吟我贈君詩對之心惻惻

感鶴

鶴有不羣者飛飛在野田饑不啄腐鼠渴不飲盜泉貞
姿自耿介雜鳥何翩翾呼淵切同遊不同志如此十餘年
一興嗜慾念遂爲矰繳牽委質小池內爭食羣雞前不
惟懷稻粱兼亦競腥羶不惟戀主人兼亦狎鳥鳶物心
不可知天性有時遷一飽尚如此況乘大夫軒

春雪

元和歲在卯六年春二月月晦寒食天天陰夜飛雪連
宵復竟日浩浩殊未歇大似落鷲毛密如飄玉屑寒銷

春茫

上聲 上聲

蒼氣變風凜冽上林草盡沒曲江水復結紅

乾杏花死綠凍楊枝折所憐物性傷非惜年芳絕上天

有時令四序平分別寒燠苟反常物性皆天闕

阿葛切

我

觀聖人意魯史有其說或記水不冰或書霜不殺上將
儆政教下以防災孽茲雪今如何信美非時節

高僕射

富貴人所愛聖人去其泰所以致仕年著在禮經內玄
元亦有訓知止則不殆二疎獨能行遺跡東門外清風

久銷歇迨此向千載斯人古亦稀何況今之代遑遑名利客白首千百輩唯有高僕射七十懸車蓋我年雖未老歲月亦云邁預恐老及時貪榮不能退中心私自傲何以爲我戒故作僕射詩書之於大帶

白牡丹

和錢學士作

城中看花客旦暮走營營素華人不顧亦占牡丹名閉在深寺中車馬無來聲唯有錢學士盡日繞叢行憐此皓然質無人自芳馨衆嫌我獨賞移植在中庭留景夜

不暝迎光曙。先明對之心。亦靜虛白相向生。唐昌玉蕊
花。攀翫衆所爭。折來比顏色。一種如瑤瓊。彼因稀見貴。
此以多爲輕。始知無正色。愛惡隨人情。豈惟花獨爾。理
與人事并。君看入眼者。紫艷與紅英。

贈內

生爲同室親。死爲同穴塵。他人尚相勉。而況我與君。黔
婁固窮士。妻賢忘其貧。冀缺一農夫。妻敬儼如賓。陶潛
不營生。翟氏自爨薪。梁鴻不肯仕。孟光甘布裙。君雖不

讀書此事耳亦聞至此千載後傳是何如人生未死
間不能忘其身所須者衣食不過飽與溫蔬食足充饑
何必膏粱珍繒絮足禦寒何必錦繡文君家有貽訓清
白遺子孫我亦貞苦士與君新結婚庶保貧與素偕老
同欣欣

寄唐生

賈誼哭時事阮籍哭路歧唐生今亦哭異代同其悲唐
生者何人五十寒且饑不悲口無食不悲身無衣所悲

忠與義悲甚則哭之太尉擊賊日

段太尉以笏擊朱泚

尚書叱盜

時

顏尚書叱李希烈

大夫死兇寇

陸大夫爲衆兵所害

諫議謫蠻夷

楊諫議左

遷道州

每見如此事聲發涕輒隨往往聞其風俗士猶或

非憐君頭半白其志竟不衰我亦君之徒鬱鬱何所爲

不能發聲哭轉作樂府詩篇篇無空文句句必盡規功

高虞人箴痛甚騷人辭非求宮律高不務文字奇惟歌

生民病願得天子知未得天子知甘受時人嗤藥良氣

味苦琴淡音聲稀不懼權豪怒亦任親朋譏人竟無奈

何呼作狂男兒每逢羣盜息或遇雲霧披但自高聲歌
庶幾天聽卑歌哭雖異名所感則同歸寄君三十章與
君爲哭詞

傷唐衢二首

自我心存道外物少能逼常排傷心事不爲長歎息忽
聞唐衢死不覺動顏色悲端從東來觸我心惻惻伊昔
未相知偶遊滑臺側同宿李翱家一言如舊識酒酣出
送我風雪黃河北日西並馬頭語別至昏黑君歸向東

鄭我來遊上國交心不交面從此重相憶憐君儒家子
不得詩書力五十著青衫試官無祿食遺文僅千首六
義無差忒散在京洛間何人爲收拾

憶昨元和初忝備諫官位是時兵革後生民正憔悴但
傷民病痛不識時忌諱遂作秦中吟一吟悲一事貴人
皆怪怒閒人亦非訾天高未及聞荆棘生滿地惟有唐
衢見知我平生志一讀興歎嗟再吟垂涕泗因和三十
韻手題遠緘寄致吾陳杜閒賞愛非常意此人無復見

此詩猶可貴今日開篋看蠹魚損文字不知何處葬欲

問先歔歔終去哭墳前還君一掬淚

陳杜謂子昂與甫也此詩猶可貴謂

唐衢詩也

問友

種蘭不種艾蘭生艾亦生根荻相交長莖葉相附榮香
莖與臭葉日夜俱長大鋤艾恐傷蘭溉蘭恐滋艾蘭亦
未能溉艾亦未能除沈吟意不決問君欲何如

悲哉行

悲哉爲儒者力學不知疲讀書眼欲闇秉筆手生胝

音支

十上方一第成名常苦遲縱有宦達者兩鬢已成絲可

憐少壯日適在窮賤時丈夫老且病焉用富貴爲沈沈

朱門宅中有乳臭兒狀貌如婦人光明膏粱肌手不把

書卷身不擇

胡慣切

戎衣二十襲封爵門承勲戚資春來

日日出服御何輕肥朝從博徒飲暮有娼樓期平封還

酒債堆金選蛾眉聲色狗馬外其餘一無知山苗與澗

松地勢隨高卑古來無奈何非君獨傷悲

紫藤

藤花紫蒙茸藤葉青扶疎誰謂好顏色而爲害有餘下
如蛇屈盤上若繩縈紆可憐中間樹束縛成枯株柔蔓
不自勝嫋嫋挂空虛豈知纏樹木千夫力不如先柔後
爲害有似諛佞徒附著君權勢君迷不肯誅又如妖婦
人綢繆蠱其夫奇邪壞人室夫惑不能除寄言邦與家
所慎在其初毫末不早辨滋蔓信難圖願以藤爲戒銘
之於座隅

放鷹

十月鷹出籠草枯雉兔肥下韝

哥謳切

隨指顧百擲無一

遺鷹翅疾如風鷹爪利如錐本爲鳥所設今爲人所資孰能使之然有術甚易知取其向背性制在饑飽時不可使長飽不可使長饑饑則力不足飽則背人飛乘饑縱搏擊未飽須繫維所以爪翅功而人坐收之聖明馭英雄其術亦如斯鄙語不可棄吾聞諸獵師

慈烏夜啼

慈烏失其母啞啞

倚下切

吐哀音晝夜不飛去經年守故

林夜夜夜半啼聞者爲沾襟聲中如告訴未盡反哺心
百鳥豈無母爾獨哀怨深應是母慈重使爾悲不任昔
有吳起者母歿喪不臨嗟哉斯徒輩其心不如禽慈烏
復慈烏鳥中之曾參

鷺詩示劉叟

并序

叟有愛子背叟逃去叟甚悲念之叟少年亦嘗如是故
作鷺詩以諭之

梁上有雙鷺翩翩雄與雌銜泥兩椽間一巢生四兒四
兒日夜長索食聲孜孜青蟲不易捕黃口無飽期嗃爪
雖欲敝心力不知疲須臾十來往猶恐巢中饑辛勤三
十日母瘦雛漸肥喃喃教言語一一刷毛衣一旦羽翼
成引上庭樹枝舉翅不回顧隨風四散飛雌雄空中鳴
聲盡呼不歸却入空巢裏啁啾終夜悲鷺鷺爾勿悲爾
當返自思思爾爲雛日高飛背母時當時父母念今日
爾應知

采地黃者

麥死春不雨木損秋早霜歲晏無口食田中采地黃采
之將何用持以易餼糧凌晨荷鋤去薄暮不盈筐攜來
朱門家賣與白面郎與君啖肥馬可使照地光願易馬
殘粟救此苦饑腸

初入太行路

天冷日不光太行峯蒼莽嘗聞此中險我方獨往馬
蹄凍且滑羊腸不可上若比世路難猶自平於掌

鄧魴張徹落第

古琴無俗韻奏罷無人聽
寒松無妖花枝下無人行
春風十二街軒騎不暫停
奔車看牡丹走馬聽秦箏
衆目悅芳艷松獨守其貞
衆耳喜鄭衛琴亦不改聲
懷哉二夫子念此無自輕

送王處士

王門豈無酒侯門豈無肉
主人貴且驕待客禮不足
望塵而拜者朝夕走碌碌
王生獨拂衣遐舉如雲鵠
寧歸

白雲外飲水臥空谷不能隨衆人斂手低眉目扣門與
我別沽酒留君宿好去采薇人終南山正綠

村居苦寒

八年十二月五日雪紛紛竹柏皆凍死况彼無衣民迴
觀村閭間十室八九貧北風利如劍布絮不蔽身唯燒
蒿棘大愁坐夜待晨乃知大寒歲農者尤苦辛顧我當
此日草堂深掩門褐裘覆絕中之切被坐臥有餘溫幸免
饑凍苦又無壠畝勤念彼深可愧自問是何人

納粟

有吏夜扣門高聲催納粟
家人不待曉場上張燈燭揚
簸淨如珠一車三十斛猶憂納不中鞭責及童僕
昔余謬從事內愧才不足連授四命官坐尸十年祿
常聞古人語損益周必復今日諒甘心還他太倉穀

薛中丞

百人無一直百直無一遇
借問遇者誰正人行得路中
丞薛存誠守直心甚固
皇明燭如日再使秉王度
奸豪

與佞巧非不憎且懼直道漸光明邪謀難蓋覆每因匪
躬節知有匡時具張爲墜網網倚作頽簷柱悠悠哉上天
意報施紛迴互自古已冥茫從今猶不諭豈與小人意
昏然同好惡不然君子人何反如朝露裴相昨已夭薛
君今又去以我惜賢心五年如旦暮况聞善人命長短
繫運數今我一涕零豈爲中丞故

秋池二首

前池秋始半卉物多摧壞欲暮槿先萎未霜荷已敗默

然有所感可以從茲誠本不種松筠早凋何足怪
鑿池貯秋水中有蘋與芰天旱水暗消塌然委空地有
似汎汎者附麗權與貴一旦恩勢移相隨共憔悴

夏旱

太陰不離畢太歲仍在午旱日與炎風枯焦我田畝金
石欲銷鑠况茲禾與黍嗷嗷萬族中唯農最辛苦憫然
望歲者出門何所覩但見棘與茨蘿生徧場圃惡苗承
沴音疾氣欣然得其所感此因問天可能長不雨

諭友

昨夜霜一降殺君庭中槐乾葉不待黃索索飛下來憐
君感物節晨起步前階臨風蹋葉立半日顏色哀西望
長安城歌鐘十二街何人不歡樂君獨心悠哉白日頭
上走朱顏鏡中頽平生青雲心銷化成死灰我今贈一
言勝飲酒千杯其言雖甚鄙可破悵悵懷朱門有勲貴
陋巷有顏回窮通各有命不繫才不才推此自裕裕不
必待安排

丘中有一士二首

命首句
爲題

丘中有一士不知其姓名面色不憂苦血氣常和平每
選隙地居不謁要路行舉動無尤悔物莫與之爭藜藿
不充腸布褐不蔽形終歲守窮餓而無嗟歎聲豈是愛
貧賤深知時俗情勿矜羅弋巧鸞鶴在冥冥

丘中有一士守道歲月深行披帶索衣坐拍無絃琴不
飲濁泉水不息曲木陰所逢苟非義糞土千金鄉人
化其風薰如蘭在林智愚與強弱不忍相欺侵我欲訪

其人將行復沈吟何必見其面但在學其心

新製布裘

桂布白似雪吳綿軟於雲布重綿且厚爲裘有餘溫朝
擁坐至暮夜覆眠達晨誰知嚴冬月支體暖如春中夕
忽有念撫裘起逡巡丈夫貴兼濟豈獨善一身安得萬
里裘蓋裹周四垠穩暖皆如我天下無寒人

杏園中棗樹

人言百果中唯棗凡且鄙皮皴

七倫切

似龜手葉小如鼠

耳胡爲不自知生花此園裏豈宜遇攀翫幸免遭傷毀

二月曲江頭雜英紅旖旎亦在其間如嫫

莫胡切

對西

子東風不擇木吹煦長未已眼看欲合抱得盡生生理
寄言遊春客乞君一迴視君愛繞指柔從君憐柳杞君
求悅目艷不敢爭桃李君若作大車輪軸材須此

蝦蟇

和張十六

嘉魚薦宗廟靈龜貢邦家應龍能致雨潤我百穀芽蠢
蠢水族中無用者蝦蟇

謨加切

形穢肌肉腥出沒於泥沙

六月七月交時雨正滂沱蝦蟇得其志快樂無以加地
既蕃其生使之族類多天又與其聲得以相誼譁豈惟
玉池上汚君清冷波何獨瑤瑟前亂君鹿鳴歌常恐飛
上天跳躍隨姮娥往往蝕明月遣君無奈何

寄隱者

賣藥向都城行憩青門樹道逢馳驛者色有非常懼親
族走相送欲別不敢住私怪問道傍何人復何故云是
右丞相當國握樞務祿厚食萬錢恩深日三顧昨日延

英對今日崖州去由來君臣間寵辱在朝暮青青東郊
草中有歸山路歸去臥雲人謀身計非誤

放魚

自此後詩
到江州作

曉日提竹籃家僮買春蔬青青芹蕨下疊臥雙白魚無
聲但呀呀以氣相煦濡傾籃寫地上撥刺長尺餘豈唯
刀机憂坐見螻蟻圖脫泉雖已久得水猶可蘇放之小
池中且用救乾枯小池窄狹動尾觸四隅一時幸苟
活久遠將何如憐其不得所移放於南湖南湖連西江

金少卿集卷一
好去勿踟躕施恩即望報吾非斯人徒不須泥沙底辛
苦覓明珠

文柏牀

陵上有老柏柯葉寒蒼蒼朝爲風烟樹暮爲宴寢牀以
其多奇文宜升君子堂刮削露節目拂拭生輝光元班
狀狸首素質如截肪敷邦切雖充悅目翫終乏周身防華
彩誠可愛生理苦已傷方知自殘者爲有好文章

潯陽三題

并序

廬山多桂樹湓浦多脩竹東林寺有白蓮花皆植物之
貞勁秀異者雖宮園省寺中未必能盡有夫物以多爲
賤故南方人不貴重之至有蒸爨其桂剪棄其竹白眼
於蓮花者予惜其不生於北土也因賦三題以唁之

廬山桂

偃蹇月中桂結根依青天天風繞月起吹子下人間飄
零委何處乃落匡廬山生爲石上桂葉如剪碧鮮枝幹
日長大根茲日牢堅不歸天上月空老山中年廬山去

咸陽道里三四十無人爲移植得入上林園不及紅花
樹長栽溫室前

湓浦竹

潯陽十月天天氣仍溫燠有霜不殺草有風不落木玄
冥氣力薄草木冬猶綠誰肯湓浦頭迴眼看脩竹其有
顧盼者持刀斬且束剖劈青琅玕家家蓋牆屋吾聞汾
晉間竹少重如玉胡爲取輕賤生此西江曲

東林寺白蓮

東林北塘水湛湛見底清中生白芙蓉菡萏三百莖白
日發光彩清颺散芳馨洩香銀囊破瀉露玉盤傾我慙
塵埃眼見此瓊瑤英乃知紅蓮花虛得清淨名夏萼敷
未歇秋房結纔成夜深衆僧寢獨起繞池行欲收一顆
子寄向長安城但恐出山去人間種不生

大水

潯陽郊郭間大水歲一至閭閻半漂蕩城堞多傾墜蒼
茫生海色渺漫連空翠風捲白波翻日煎紅浪沸工商

徹屋去牛馬登山避况當率稅時頗害農桑事獨有傭
舟子鼓棹生意氣不知萬人災自覓錐刀利吾無奈爾
何爾非久得志九月霜降後水涸爲平地

白氏長慶集卷一

欽定四庫全書

白氏長慶集卷二

唐白居易撰

諷諭二

古調詩五言
凡五十八首

續古詩十首

戚戚復戚戚送君遠行役行役非中原海外黃沙磧伶
俖獨居妾迢遞長征客君望功名歸妾憂生死隔誰家
無夫婦何人不離拆所恨薄命身嫁遲別日迫妾身有

存歿妾心無改易生爲閨中婦死作山頭石

掩淚別鄉里飄飄將遠行茫茫綠野中春盡孤客情驅
馬上丘隴高低路不平風吹棠梨花啼鳥時一聲古墓
何代人不知姓與名化作路傍土年年春草生感彼忽
自悟今我何營營

朝采山上薇暮采山上薇歲晏薇亦盡饑來何所爲坐
飲白石水手把青松枝擊節獨長謠其聲清且悲櫪馬
非不肥所苦常繫維豢豕非不飽所憂竟爲犧行行歌

此曲以慰常苦饑

雨露長纖草山苗高入雲風雪折勁木澗松推爲薪風
摧此何意雨長彼何因百丈澗底死寸莖山上春可憐
苦節士感此涕盈巾

窈窕雙鬟女容德俱如玉晝居不踰閭夜行常秉燭氣
如含露蘭心如貫霜竹宜當備嬪御胡爲守幽獨無媒
不得選年忽過三六歲暮望漢宮誰在黃金屋邯鄲進
娼女能唱黃花曲一曲稱君心恩榮連九族

栖栖遠方士讀書三十年業成無知己徒步來入關長
安多王侯英俊競攀援幸隨衆賓未得廁門館間東閣
有旨酒中堂有管絃何爲向隅客對此不開顏富貴無
是非主人終日歡貧賤多悔尤客子終夜歎歸去復歸
去故鄉貧亦安

涼風飄嘉樹日夜減芳華下有感秋婦攀條苦悲嗟我
本幽閒女結髮事豪家豪家多婢僕門內頗驕奢良人
近封侯出入鳴玉珂自從富貴來恩薄讒言多冢婦獨

守禮羣妾互奇衰

斜音

但信言有玷不察心無瑕容光未

銷歇歡愛忽蹉跎何意掌上玉化爲眼中砂盈盈一尺水浩浩千丈河勿言小大異隨分有風波閨房猶復爾邦國當如何

心亦無所迫身亦無所拘何爲腸中氣鬱鬱不得舒不舒良有以同心久離居五年不見面三年不得書念此令人老抱膝坐長吁豈無盈樽酒非君誰與娛

攬衣出門行遊觀遶林渠澹澹春水暖東風生綠蒲上

卷二
有和鳴鴈下有掉尾魚飛沈一何樂鱗羽各有徒而我
方獨處不與之子俱顧彼自傷已禽魚之不如出遊欲
遣憂孰知憂有餘

春旦日初出瞳瞳耀晨輝草木照未遠浮雲已蔽之天
地黯以晦當午如昏時雖有東南風力微不能吹中園
何所有滿地青青葵陽光委雲上傾心欲何依

秦中吟十首

并序

貞元元和之際予在長安聞見之間有足悲者因直歌

其事命爲秦中吟

議婚

天下無正聲悅耳卽爲娛人間無正色悅目卽爲姝顏
色非相遠貧富則有殊貧爲時所棄富爲時所趨紅樓
富家女金縷繡羅襦見人不斂手嬌癡二八初母兄未
開口已嫁不須史綠窓貧家女寂寞二十餘荆釵不直
錢衣上無真珠幾迴人欲聘臨日又踟躕主人會良媒
置酒滿玉壺四座且勿飲聽我歌兩途富家女易嫁嫁

早輕其夫貧家女難嫁嫁晚孝於姑聞君欲娶婦娶婦
意何如

重賦

厚地植桑麻所要濟生民生民理布帛所求活一身身
外充征賦上以奉君親國家定兩稅本意在愛人厥初
防其淫明敕內外臣稅外加一物皆以枉法論奈何歲
月久貪吏得因循浚我以求寵斂索無冬春織絹未成
疋縑絲未盈斤里胥迫我納不許暫逡巡歲暮天地閉

陰風生破村夜深烟火盡霰雪白紛紛幼者形不蔽老
者體無溫悲喘與寒氣併入鼻中辛昨日輸殘稅因窺
官庫門繒帛如山積絲絮如雲屯號爲羨餘物隨月獻
至尊奪我身上暖買爾眼前恩進入瓊林庫歲久化爲
塵

傷宅

誰家起甲第朱門大道邊豐屋中櫛比高牆外迴環累
累六七堂棟宇相連延一堂費百萬鬱鬱起青烟洞房

溫且清寒暑不能干高堂虛且迴坐臥見南山繞廊紫
藤架夾砌紅藥欄攀枝摘櫻桃帶花移牡丹主人此中
坐十載爲大官厨有臭敗肉庫有貫朽錢誰能將我語
問爾骨肉間豈無窮賤者忍不救饑寒如何奉一身直
欲保千年不見馬家宅今作奉誠園

傷友

又云傷
苦節士

陋巷孤寒士出門苦栖栖雖云志氣在豈免顏色低平
生同門友通籍在金閨曩者膠漆契邇來雲雨睽正逢

下朝歸軒騎五門西是時天久陰三日雨淒淒蹇驢避
路立肥馬當風嘶迴頭忘相識占道上沙堤昔年洛陽
社貧賤相提攜今日長安道對面隔雲泥近日多如此
非君獨慘悽死生不變者唯聞任與黎

任公孫
黎逢

不致仕

七十而致仕禮法有明文何乃貪榮者斯言如不聞可
憐八九十齒墮雙眸昏朝露貪名利夕陽憂子孫掛冠
顧翠綈懸車惜朱輪金章腰不勝偃僂入君門誰不愛

富貴誰不戀君恩年高須告老名遂合退身少時共嗤
誚晚歲多因循賢哉漢二疎彼獨是何人寂寞東門路
無人繼去塵

立碑

勲德既下哀文章亦陵夷但見山中石立作路旁碑銘
勲悉太公敘德皆仲尼復以多爲貴千言直萬賢爲文
彼何人想見下筆時但欲愚者悅不思賢者嗤豈獨賢
者嗤仍傳後代疑古石蒼苔字安知是愧詞我聞望江

縣麴令撫惇嫠

麴令名信陵

在官有仁政名不聞京師身歿

欲歸葬百姓遮路岐攀轅不得去留葬此江湄至今道
其名男女涕皆垂無人立碑碣唯有邑人知

輕肥

意氣驕滿路鞍馬光照塵借問何爲者人稱是內臣朱
紱皆大夫紫綬或將軍誇赴軍中宴走馬去如雲罇壘
溢九醞水陸羅八珍果擘洞庭橘膾切天池鱗食飽心
自若酒酣氣益振是歲江南旱衢州人食人

五絃

清歌且罷唱紅袂亦停舞趙叟抱五絃宛轉當胸撫大

聲麓若散颯颯

悉合切
又音立

風和雨小聲細欲絕切切鬼神

語又如鵲報喜轉作猿啼苦十指無定音顛倒宮徵羽
坐客聞此聲形神若無主行客聞此聲駐足不能舉嗟
嗟俗人耳好今不好古所以綠窓琴日日生塵土

歌舞

秦城歲云暮大雪滿皇州雪中退朝者朱紫盡公侯貴

有風雪興富無饑寒憂所營唯第宅所務在追遊朱門
車馬客紅燭歌舞樓歡酣促密坐醉暖脫重裘秋官爲
主人廷尉居上頭日中爲一樂夜半不能休豈知閹無分
切鄉獄中有凍死囚

買花

帝城春欲暮喧喧車馬度共道牡丹時相隨買花去貴
賤無常價酬直看花數灼灼百朶紅戔戔五束素上張
幄幕庇旁織笆籬護水洒復泥封移來色如故家家習

爲俗人人迷不悟有一田舍翁偶來買花處低頭獨長
歎此歎無人喻一叢深色花十戶中人賦

贈友五首

并序

吾友有王佐之才者以致君濟人爲已任識者深許之
因贈是詩以廣其志云

一年十二月每月有常令君出臣奉行謂之握金鏡由
茲六氣順以遂萬物性時令一反常生靈受其病周漢
德下衰王風始不競又從斬晁錯諸侯益強盛百里不

同禁四時自爲政盛夏興土功方春勸人命誰能救其
失待君佐邦柄戕戕象魏門懸法彞倫正

銀生楚山曲金生鄱溪濱南人棄農業求之多苦辛披
砂復鑿石矺矺無冬春手足盡皴

七倫切

胾愛利不愛身

畬田既慵斫稻田亦懶耘相攜作游手皆道求金銀畢
竟金與銀何殊泥與塵且非衣食物不濟饑寒人棄本
以趨末日富而歲貧所以先聖王棄藏不爲珍誰能反
古風待君秉國鈞捐金復抵璧勿使勞生民

私家無錢鑪平地無銅山胡爲秋夏稅歲歲輸銅錢錢力日已重農力日已殫賤糶粟與麥賤貿絲與綿歲暮衣食盡焉得無饑寒吾聞國之初有制垂不刊傭必筭丁口租必計桑田不求土所無不强人所難量入以爲出上足下亦安兵興一變法兵息遂不還使我農桑人顛顛畎畝間誰能革此弊待君秉利權復彼租庸法令如貞觀年

京師四方則王化之本根長吏久於政然後風教敦如

何尹京者遷次不遽巡請君屈指數十年十五人科條
日相矯吏力亦已勤寬猛政不一民心安得淳九州雍
爲首羣牧之所遵天下率如此何以安吾民誰能變此
法待君贊絲綸慎擇循良吏令其長子孫

三十男有室二十女有歸近代多離亂婚姻多過期嫁
娶既不早生育常苦遲兒女未成人父母已衰羸凡人
貴達日多在長大時欲報親不待孝心無所施哀哉三
牲養少得及庭闈惜哉萬鍾粟多用飽妻兒誰能正婚

禮待君張國維庶使孝子心皆無風樹悲

寓意詩五首

豫樟生深山七年而後知挺高二百尺本末皆十圍天子建明堂此材獨中規匠人執斤墨采度將有期孟冬草木枯烈火燎山陂疾風吹猛焰從根燒到枝養材三十年方成棟梁姿一朝爲灰燼柯葉無孑遺地雖生爾材天不與爾時不如糞土英猶有人掇之已矣勿重陳重陳令人悲不悲焚燒苦但悲採用遲

赫赫京內史炎炎中書郎昨傳徵拜日恩賜頗殊常貂
冠水蒼玉紫綬黃金章佩服身未暖已聞竄遐荒親戚
不得別吞聲泣路傍賓客亦已散門前雀羅張富貴來
不久倏如瓦溝霜權勢去尤速瞥若石火光不如守貧
賤貧賤可久長傳語宦遊子且來歸故鄉

促織不成章提壺但聞聲嗟哉蟲與鳥無實有虛名與
君定交日久要如弟兄何以示誠信白水指爲盟雲雨
一爲別飛沈兩難并君爲得風鵬我爲失水鯨音信日

已踈恩分日已輕窮通尚如此何況死與生乃知擇交
難須有知人明莫將山上松結託水上萍

翩翩兩元鳥本是同巢燕分飛來幾時秋夏涼變一
宿蓬華廬一栖明光殿偶因銜泥處復得重相見彼矜
杏梁貴此嗟茅棟賤眼看秋社至兩處俱難戀所託各
暫時胡爲相歎羨

婆娑園中樹根株大合圍蠢爾樹間蟲形質一何微孰
謂蟲之微蟲蠢已無期孰謂樹之大花葉有衰時花衰

夏未實葉病秋先萎樹心半爲土觀者安得知借問蟲
何在在身不在枝借問蟲何食食心不食皮豈無啄木
鳥觜長將何爲

讀史五首

楚懷放靈均國政亦荒淫彷徨未忍決遶澤行悲吟漢
文疑賈生謫置湘之陰是時刑方措此去難爲心士生
一代間誰不有浮沈良時真可惜亂世何足欽乃知汨
羅恨未抵長沙深

金匱要略卷二
禍患如棼絲其來無端緒馬遷下蠶室嵇康就囹圄抱
冤志氣屈忍恥形神沮當被戮辱時奮飛無翅羽商山
有黃綺潁川有巢許何不從之遊超然離網罟山林少
羈鞅世路多艱阻寄謝伐檀人慎勿嗟窮處

漢日大將軍少爲乞食子秦時故列侯老作鋤瓜士春
華何暉暉園中發桃李秋風忽蕭條堂上生荆杞深谷
變爲岸桑田成海水勢去未須悲時來何足喜寄言榮
枯者反復殊未已

含沙射人影雖病人不知巧言構人罪至死人不疑掇
蜂殺愛子掩鼻戮寵姬弘恭陷蕭望趙高謀李斯陰德
既必報陰禍豈虛施人事雖可罔天道終難欺明則有
刑辟幽則有神祇苟免勿私喜鬼得而誅之

季子憔悴時婦見不下機買臣負薪日妻亦棄如遺一
朝黃金多佩印衣錦歸去妻不敢視婦嫂強依依富貴
家人重貧賤妻子欺奈何貧富間可移親愛志遂使中
人心汲汲求富貴又令下人力各競錐刀利隨分歸舍

金定四庫全書
卷二
來一取妻孥意

和答詩十首

并序

五年春微之從東臺來不數日又左轉爲江陵士曹掾
詔下日會予下內直歸而微之已即路邂逅相遇於街
衢中自永壽寺南抵新昌里北得馬上話別語不過相
勉保方寸外形骸而已因不暇及他是夕足下次于山
北寺僕職役不得去命季弟送行且奉新詩一軸致於
執事凡二十章率有比興淫文艷韻無一字焉意者欲

足下在途諷讀且以遣日時消憂懣又有以張直氣而
扶壯心也及足下到江陵寄在路所爲詩十七章凡五
六千言言有爲章有旨迨于宮律體裁皆得作者風發
絨開卷且喜且怪僕思牛僧孺戒不能示他人唯與杓
直拒非及樊宗師輩三四人時一吟讀心甚貴重然竊
思之豈僕所奉者二十章遽能開足下聰明使之然耶
抑又不知足下是行也天將屈足下之道激足下之心
使感時發憤而臻於此耶若兩不然者何立意措辭與

足下前時詩如此之相遠也僕既羨足下詩又憐足下
心盡欲引狂簡而和之屬直宿拘牽居無暇日故不即
時如意旬月來多乞病假假中稍閒且摘卷中尤者繼
成十章亦不下三千言其間所見同者固不能自異異
者亦不能強同同者謂之和異者謂之答并別錄和夢
遊春詩一章各附與本篇之末餘未和者亦續致之項
者在科試間嘗與足下同筆硯每下筆時輒相顧共患
其意太切而理太周故理太周則辭繁意太切則言激

然與足下爲文所長在於此所病亦在於此足下來序
果有辭犯文繁之說今僕所和者猶前病也待與足下
相見日各引所作稍刪其繁而晦其義焉餘具書白

和思歸樂

山中不栖鳥夜半聲嚶嚶似道思歸樂行人掩泣聽皆
疑此山路遷客多南征憂憤氣不散結化爲精靈我謂
此山鳥本不因人生人心自懷土想作思歸鳴孟嘗平
居時娛耳琴泠泠雍門一言感未奏淚沾纓魏武銅雀

妓日與歡樂并一旦西陵望欲歌先涕零峽猿亦何意
隴水復何情爲入愁人耳皆爲腸斷聲請看元侍御亦
宿此郵亭因聽思歸鳥神氣獨安寧問君何以然道勝
心自平雖爲南遷客如在長安城云得此道來何慮亦
何營窮達有前定憂喜無交爭所以事君日持憲立大
庭雖有迴天力撓之終不傾況始三十餘年少有直名
心中志氣大眼前爵祿輕君恩若雨露君威若雷霆退
不苟免難進不曲求榮在大辨玉性經霜識松貞展禽

任三黜靈均長獨醒
獲戾自東洛貶官向南荆
再拜辭闕下長揖別公卿
荊州又非遠驛路半月程
漢水照天碧楚山插雲青
江陵橘似珠宜城酒如餚
徐盈切誰謂譴謫去未妨
遊賞行人生百歲內天地暫
寓形太倉一稊米大海一浮萍
身委逍遙篇心付頭陀經
尚達死生觀寧爲寵辱驚
中懷苟有主外物安能縈
任意思歸樂聲聲啼到明

和陽城驛

商山陽城驛中有歎者誰云是元監察江陵謫去時忽
見此驛名良久涕欲垂何故陽道州名姓同於斯憐君
一寸心寵辱誓不移疾惡若巷伯好賢如緇衣沈吟不
能去意者欲改爲改爲避賢驛大署於門楣荆人愛羊
祜戶曹改爲辭一字不忍道况兼姓呼之因題八百言
言直文甚奇詩成寄與我鏗若金和絲上言陽公行友
悌無等夷骨肉同衾裯至死不相離次言陽公迹夏邑
始棲遲鄉人化其風少長皆孝慈次言陽公道終日對

酒卮兄弟笑相顧醉貌紅怡怡次言陽公節謇謇居諫
司誓心除國蠹決死犯天威終言陽公命左遷天一涯
道州炎瘴地身不得生歸一一皆實錄事事無子遺凡
是爲善者聞之惻然悲道州既已矣往者不可追何世
無其人來者亦可思願以君子文告彼大樂師附於雅
歌末奏之白玉墀天子聞此章教化如法施直諫從如
流佞臣惡如疵宰相聞此章政柄端正持進賢不知倦
去邪勿復疑憲臣聞此章不敢懷依違諫官聞此章不

忍縱詭隨然後告史氏舊史有前規若作陽公傳欲令
後世知不勞叙世家不用費文辭但使國史上全錄元
稹詩

答桐花

山木多蓊鬱茲桐獨亭亭葉重碧雲片花簇紫霞英是
時三月天春暖山雨晴夜色向月淺闇香隨風輕行者
多商賈居者悉黎氓無人解賞愛有客獨屏營手攀花
枝立足躅花影行生憐不得所死欲揚其聲截爲天子

琴刻作古人形云待我成器薦之於穆清誠是君子心恐
非草木情胡爲愛其華而反傷其生老龜被剝腸不如無
神靈雄雞自斷尾不願為犧牲況此好顏色花紫葉青青
宜遂天地性忍加刀斧刑我思五丁力拔入九重城當君
正殿栽花葉生光晶上對月中桂下覆堦前蔭汎拂香爐
烟隱映斧藻屏為君布綠陰當暑蔭軒楹沈沈綠滿地桃
李不敢爭爲君發清韻風來如叩瓊泠泠聲滿耳鄭衛不
足聽受君封植力不獨吐芬馨助君行春令開花應晴明

受君雨露恩不獨含芳榮戒君無戲言剪葉封弟兄受君
歲月功不獨資生成爲君長高枝鳳凰上頭鳴一鳴君
萬歲壽如山不傾再鳴萬人泰泰階爲之平如何有此
用幽滯在巖坳涓熒切歲月不爾駐孤芳坐凋零請向桐
枝上爲余題姓名待余有勢力移爾獻丹庭

和大嘴烏

烏者種有二名同性不同嘴小者慈孝嘴大者貪庸嘴
大命又長生來十餘冬物老顏色變頭毛白茸茸飛來

庭樹上初但驚兒童老巫生奸計與烏意潜通云是非
凡鳥遙見起敬恭千歲乃一出喜賀主人翁祥瑞來白
日神靈占知風陰作北斗使能爲人吉凶此鳥所止家
家產日夜豐上以致壽考下可宜田農主人富家子身
老心童蒙隨巫拜復祝婦姑亦相從殺雞薦其肉敬若
禋六宗烏喜張大觜飛接在虛空烏既飽羶腥巫亦饗
甘濃烏巫互相利不復兩西東日日營巢窟稍稍近房
櫳雖生八九子誰辨其雌雄羣雛又長成衆觜逞殘兇

探巢吞燕卵入簇啄蠶虫豈無乘秋隼羈絆委高墉但
食烏殘肉無施搏擊功亦有能言鸚翅碧觜距紅暫曾
說烏罪囚閉在深籠青青窓前柳鬱鬱井上桐貪烏占
栖息慈烏獨不容慈烏爾奚爲來往何懂懂曉去先晨
鼓暮歸後昏鐘辛苦塵土間飛啄禾黍蕪得食將毋哺
餓腸不自充主人憎慈烏命子削彈弓弦續會稽竹丸
鑄荆山銅慈烏求母食飛下爾庭中數粒未入口一丸
已中胸仰天號一聲似欲訴蒼穹反哺日未足非是惜

微躬誰能持此冤一爲問化工胡然大背烏竟得天年
終

答四皓廟

天下有道見無道卷懷之此乃聖人語吾聞諸仲尼矯
矯四先生同稟希世資隨時有顯晦秉道無磷緇秦皇
肆暴虐二世邁亂離先生相隨去商嶺採紫芝君看秦
獄中戮辱者李斯劉項爭天下謀臣竟悅隨先生如鸞
鶴出入冥冥飛君看齊鼎中焦爛者酈其子房得沛公

自謂相遇遲八難掉舌樞三畧役心機辛苦十數年晝
夜形神疲竟雜霸者道徒稱帝者師子房爾則能此非
吾所宜漢高之季年嬖寵鍾所私冢嫡欲廢奪骨肉相
憂疑豈無子房口口舌無所施亦有陳平心心計將何
爲皓皓四先生高冠危映眉從容下南山顧盼入東闈
前瞻惠太子左右生羽儀却顧戚夫人楚舞無光輝心
不畫一計口不吐一詞閤定天下本遂安劉氏危子房
吾則能此非爾所知先生道既光太子禮甚卑安車留

不住功成棄如遺如彼旱天雲一雨百穀滋澤則在天
下雲復歸希夷勿高巢與由勿尚呂與伊巢由往不返
伊呂去不歸豈如四先生出處兩逶迤何必長隱逸何
必長濟時由來聖人道無朕不可窺卷之不盈握舒之
亘八陲先生道甚明夫子猶或非願子辨其惑爲予吟
此詩

和雉媒

吟君雉媒什一哂復一歎和之一何晚今日乃成篇豈

唯烏有之抑亦人復然張陳刎頸交竟以勢不完至今

不平氣塞絕泚

旨而切

水源趙襄骨肉親亦以利相殘至

今不善名高於磨笄山况此籠中雉志在飲啄間稻粱

暫入口性已隨人遷身苦亦自忘同族何足言但恨爲

媒拙不足以自全勸君今日後養烏養青鸞青鸞一失

侶至死守孤單勸君今日後結客結任安主人賓客去

獨住在門闌

和松樹

亭亭山上松——生朝陽森聳上參天柯條百尺長漠漠塵中槐兩兩夾康莊婆婆低覆地枝幹亦尋常八月白露降槐葉次第黃歲暮滿山雪松色鬱青蒼彼如君子心秉操貫冰霜此如小人面變態隨炎涼共知松勝槐誠欲栽道傍糞土種瑤草瑤草終不芳尚可以斧斤伐之爲棟梁殺身獲其所爲君構明堂不然終天老死在南岡不願亞枝葉低隨槐樹行

答箭鏃

矢人職司憂爲箭恐不精精在利其鏃錯磨鋒鏑成插

以青竹斡

古早切

羽之赤鴈翎勿言分寸鐵爲用乃長兵

聞有狗盜者晝伏夜潛行摩弓拭箭鏃夜射不待明一

盜既流血百犬同吠聲狺狺嗥不已主人爲之驚盜心

憎主人主人不知情反責鏃太利矢人獲罪名寄言控

弦者願君少留聽何不向西射西天有狼星何不向東

射東海有長鯨不然學仁貴三矢平虜廷不然學仲連

一發下燕城胡爲射小盜此用無乃輕徒沾一點血虛

污箭頭腥

和古社

廢村多年樹生在古社隈爲作妖狐窟心空身未摧妖
狐變美女社樹成樓臺黃昏行人過見者心徘徊饑鵬
竟不捉老犬反爲媒歲媚少年客十去九不迴昨夜雲
雨合烈風驅迅雷風拔樹根出雷劈社壇開飛電化爲
火妖狐燒作灰天明至其所清曠無氛埃舊地葺村落
新田闢荒萊始知天降火不必常爲災勿謂神默默勿

金史卷之二
卷二
謂天恢恢勿喜犬不捕勿誇鵬不猜寄言狐媚者天火
有時來

和分水嶺

高嶺峻稜稜細泉流疊疊勢分合不得東西隨所委悠
悠草蔓底濺濺石罅裏分流來幾年晝夜兩如此朝宗
遠不及去海三千里浸潤小無功山苗長旱死縈紆用
無所奔迫流不已唯作鳴咽聲夜入行人耳有源殊不
竭無坎終難至同出而異流君看何所似有似骨肉親

派別從茲始又似勢利交波瀾相背起所以贈君詩將
君何所比不比山上泉比君井中水

有木詩八首

并序

余嘗讀漢書列傳見佞順嬖

於檢切

嬰

於何切

圖身忘國如

張禹輩者見惑上蠱下交亂君親如江充輩者見暴狠
跋扈墾君樹黨如梁冀輩者見色仁行違先德後賊如
王莽輩者又見外狀恢弘中無實用者又見附離權勢
隨之覆亡者其初皆有動人之才足以惑衆媚主莫不

卷二
合於始而敗於終也因引風人騷人之興賦有木八章
不獨諷前人亦做後代爾

有木名弱柳結根近清池風烟借顏色雨露助華滋
栽白雪花嫋嫋青絲枝漸密陰自庇轉高梢四垂截枝
扶為杖軟弱不自持折條用樊圃柔脆非其宜為樹信
可翫論材何所施可惜金堤地栽之徒爾為

有木名櫻桃得地早滋茂葉密獨承日花繁偏受露迎
風闇搖動引鳥潛來去鳥啄子難成風來枝莫住低軟

易攀翫佳人屢迴顏色求桃李饒心向松筠妬好是映
牆花本非當軒樹所以姓蕭人曾為伐櫻賦

有木秋不凋青青在江北謂為洞庭橘美人自移植上
受顧盼恩下勤澆溉力實成乃是枳臭苦不堪食物有
似是者真偽何由識美人默無言對之長歎息中含害
物意外矯凌霜色仍向枝葉間潛生刺如棘

有木名杜梨陰森覆丘壑心蠹已空朽根深尚盤薄媚
狐言語巧妖鳥聲音惡憑此為巢穴往來互棲託四傍

五六本枝葉相交錯借問因何生秋風吹子落為長社

壇下無人敢艾

師銜切

所幾度野火來風迴燒不着

有木香冉冉山頭生一發

方伐切

主人不知名移種近軒

闥愛其有芳味因以調麴藥前後曾飲者十人無一活
豈徒悔封植兼亦誤采掇試問識藥人始知名野葛年
深已滋蔓刀斧不可伐何時猛風來為我連枝拔

有木名水榿遠望青童童根株非勁挺柯葉多蒙籠彩

翠色如柏鱗皴

七倫切

皮似松為同松柏類得列嘉樹中

枝弱不勝雪勢高常懼風雪壓低還舉風吹西復東柔
芳甚楊柳早落先梧桐惟有一堪賞中心無蠹虫

有木名凌霄擢秀非孤標偶依一株樹遂抽百尺條託
根附樹身開花寄樹梢自謂得其勢無因有動搖一旦
樹摧倒獨立暫飄飄疾風從東起吹折不終朝朝為拂
雲花暮為委地樵寄言立身者勿學柔弱苗

有木名丹桂四時香馥馥花團夜雪明葉剪春雲綠風
影清似水霜枝冷如玉獨占小山幽不容凡鳥宿匠人

愛芳直裁截為厦屋幹細力未成用之君自速重任雖
大過直心終不曲縱非梁棟材猶勝尋常木

歎魯二首

季桓心豈忠其富過周公陽貨道豈正其權執國命由
來富與權不繫才與賢所託得其地雖愚亦獲安氣肥
因糞壤鼠穩依社壇虫獸尚如此豈謂無因緣

展禽胡為者直道竟三黜顏子何如人屢空聊過日皆
懷王佐道不踐陪臣秩自古無奈何命為時所屈有如

草木分天各與其一荔枝非名花牡丹無甘實

反鮑明遠白頭吟

炎炎者烈火營營者小蠅火不熱貞玉蠅不點清水此
苟無所受彼莫能相仍乃知物性中各有能不能古稱
怨恨死則人有所懲懲淫或應可在道未為弘譬如蜩
鷦徒啾啾啅音卓龍鵬宜當委之去寥廓高飛騰豈能泥
塵下區區酬怨憎胡為坐自苦吞悲仍撫膺


青塚

上有飢鴈號下有枯蓬走茫茫邊雪裏一掬沙培塿傳
是昭君墓埋閉蛾眉久凝脂化為泥鉛黛復何有時有
陰怨氣常生墳左右鬱鬱如苦霧不隨骨銷朽婦人無
他才榮枯繫妍否何乃明妃命獨懸畫工手丹青一註
誤白黑相紛亂同糾遂使君眼中西施作嫫母同儕傾寵
幸異類為配偶禍福安可知美顏不如醜何言一時事
可戒千年後特報後來妹不須倚眉首無辭挿荆釵嫁
作貧家婦不見青塚上行人為澆酒

雜感

君子防悔尤賢人戒行藏嫌疑遠仄李言動慎毫芒立
教固如此撫事有非常為君持所感仰面問蒼蒼犬齧
桃樹根李樹反見傷老龜烹不爛延禍及枯桑城門自
焚蕪池魚罹其殃陽貨肆兇暴仲尼畏於匡魯酒薄如
水邯鄲音寒開戰場伯禽鞭見血過失由成王都尉身
降虜宮刑加子長呂安兄不道都市殺嵇康斯人死已
久其事甚昭彰是非不由已禍患安可防使我千載後

涕泗滿衣裳



白氏長慶集卷二

欽定四庫全書

集部

白氏長慶集卷三

七至

詳校官監察御史_臣查瑩

檢討_臣何思鈞覆勘

總校官知縣_臣繆琪

校對官助教_臣卜惟吉

謄錄監生_臣袁瑩

欽定四庫全書

白氏長慶集卷三

唐白居易撰

諷諭三

新樂府并序凡二十首
元和四年為左拾遺時作

序曰凡九千二百五十二言斷為五十篇篇無定句句
無定字繫於意不繫於文首句標其目卒章顯其志詩
三百之義也其辭質而徑欲見之者易諭也其言直而
切欲聞之者深誠也其事覈而實使采之者傳信也其

體順而肆可以播茲樂章歌曲也總而言之為君為臣
為民為物為事而作不為文而作也

七德舞

美撥亂陳王業也

武德中天子始作
秦王破陳樂以歌

太宗之功業貞觀初太宗重制破陳樂舞圖
詔魏徵虞世南等為之歌詞名七德舞自龍
朔已後詔郊廟
享宴皆先奏之

七德舞七德歌傳自武德至元和元和小臣白居易觀
舞聽歌知樂意樂終稽首陳其事太宗十八舉義兵白
旄黃鉞定兩京擒充戮竇四海清二十有四功業成二

十有九即帝位三十有五致太平功成理定何神速速

在推心置人腹士卒遺骸散帛收

貞觀初詔天下陣死骸骨致祭瘞埋之尋

又散帛以求之也

饑人賣子分金贖

貞觀五年大飢人有鬻男女者詔出御府金帛盡贖

之還其父母

魏徵夢見天子泣

魏徵疾亟太宗夢與徵別既寤流涕是夕徵卒故御親制

碑云昔殷宗得良弼於夢中今朕失賢臣於覺後

張謹哀聞辰日哭

張公謹卒太宗為之

舉哀有司奏日在辰陰陽所忌不可哭上曰君臣義重父子之情也情發於中安知辰日遂哭之

怨女

三千放出宮

太宗常謂侍臣曰婦人幽閉深宮情實可愍今將出之任求伉儷於是令左丞戴胄

給事中杜正倫於掖庭宮西門揀出數千人盡放歸

死囚四百來歸獄

貞觀六年親錄囚徒

死罪者三百九十放出歸家令明剪鬚燒藥賜功臣李

勣嗚咽思殺身

李勣常疾醫云得龍鬚燒灰方可療之太宗自剪鬚燒灰賜之服訖而愈勣叩

頭泣涕而謝

含血吮瘡撫戰士思摩奮呼乞効死

李思摩當

親為吮血

不獨善戰善乘時以心感人人心歸爾來一百九

十載天下至今歌舞之歌七德舞七德聖人有作垂無
極豈徒耀神武豈徒誇聖文太宗意在陳王業王業艱
難示子孫

法曲歌 美列聖正華聲也

法曲法曲歌大定積德重熙有餘慶永徽之人舞而詠

永徽之時有貞觀之遺風故高宗制一戎大定樂曲也

法曲法曲舞霓裳政和世

理音洋洋開元之人樂且康

霓裳羽衣曲起於開元盛於天寶也

法曲法

曲歌堂堂堂之慶垂無疆中宗肅宗復鴻業唐祚中

興萬萬葉

永隆元年太常丞李嗣貞善審音律能知興衰云近者樂府有堂堂之音唐祚再興之兆

法曲法曲合夷歌夷聲邪亂華聲和以亂干和天寶末

明年胡塵犯宮闕

法曲雖似失雅音蓋詰夏之聲也故歷朝行焉玄宗雖雅好度曲然未嘗

使蕃漢雜奏夫寶十三載始詔諸道調法曲與胡部新聲合作識者深異之明年冬而安祿山反也乃知

法曲本華風苟能審音與政通一從胡曲相參錯不辨興衰與哀樂願求牙曠正華音不令夷夏相交侵

二王後 明祖宗之意也

二王後彼何人介公鄒

戶圭切

公為國賓周武隋文之子

孫古人有言天下者非是一人之天下周亡天下傳于隋隋人失之唐得之唐興十葉歲二百介公鄒公世為客明堂太廟朝享時引居賓位備威儀備威儀助郊祭高祖太宗之遺制不獨興滅國不獨繼絕世欲令嗣位

守文君亡國子孫取為戒

海漫漫 戒求仙也

海漫漫直下無底傍無邊
雲濤烟浪最深處人傳中有
三神山山上多生不死藥
服之羽化為天仙秦皇漢武
信此語方士年年采藥去
蓬萊今古但聞名煙水茫茫
無覓處海漫漫風浩浩眼穿
不見蓬萊島不見蓬萊不

敢歸童男

音貫

舟中老徐福文成多誑誕
上元太一

虛祈禱君看驪山頂上茂陵頭
畢竟悲風吹蔓草何況

玄元聖祖五千言不言藥不言仙不言白日昇青天

立部伎 刺雅樂之替也

太常選坐部伎無性識者退入立部伎又

選立部伎絕無性識者退入雅樂部則雅聲可知矣

立部伎鼓笛箏舞雙劍跳七九嫋巨索掉長竿太常部伎有等級堂上者坐堂下立堂上坐部笙歌清堂下立部鼓笛鳴笙歌一曲衆側耳鼓笛萬曲無人聽立部賤坐部貴坐部退為立部伎擊鼓吹笙和雜戲立部又退何所任始就樂懸操雅音雅音替壞一至此長令爾輩

調宮徵圓丘后土郊祀時言將此樂感神祇欲望鳳來
百獸舞何異北轅將適楚工師愚賤安足云太常三卿
爾何人

華原磬 刺樂工非其人也

天寶中始廢泗濱磬用華原石代之

詢諸磬人則曰故老云泗濱磬下調之不能和得華原石考之乃和由是不改

華原磬華原磬古人不聽今人聽泗濱石泗濱石今人不擊古人擊今人古人何不同用之捨之由樂工樂工雖在耳如壁不分清濁卽爲聾梨園弟子調律呂知有

新聲不如古古稱浮磬出泗濱立辯致死聲感人宮懸
一聽華原石君心遂忘封疆臣果然胡寇從燕起武臣
少肯封疆死始知樂與時政通豈聽鏗鏘而已矣磬襄
入海去不歸長安市兒爲樂師華原磬與泗濱石清濁
兩聲誰得知

上陽白髮人

愍怨曠也

天寶五載已後楊貴妃專寵後宮人無復

進幸矣六宮有笑色者輒置別所
上陽是其一也貞元中尚存焉

上陽人紅顏闇老白髮新綠衣監使守宮門一閉上陽

多少春玄宗末歲初選入八時十六今六十同時采擇
百餘人零落年深殘此身憶昔吞悲別親族扶入車中
不教哭皆云入內便承恩臉似芙蓉冑似玉未容君王
得見面已被楊妃遙側目妬令潛配上陽宮一生遂向
空房宿宿空房秋夜長夜長無寐天不明耿耿殘燈背壁
影蕭蕭暗雨打窗聲春日遲日遲獨坐天難暮宮鶯百轉愁
厭聞梁燕雙栖老休妬鶯歸燕去長悄然春往秋來不
記年唯向深宮望明月東西四五百迴圓今日宮中年

最老大家遙賜尚書號小頭鞋履窄衣裳青黛點眉眉
細長外人不見見應笑天寶末年時世粧上陽人苦最
多少亦苦老亦苦少苦老苦兩如何君不見昔時呂尚
美人賦天寶末有密未艷色者當時號為花鳥使呂尚獻美人賦以諷之又不見今日上

陽白髮歌

胡旋女 戒近習也天寶末康居國獻之

胡旋女胡旋女心應絃手應鼓絃鼓一聲雙袖舉迴雪
飄飄轉蓬舞左旋右轉不知疲千匝萬周無已時人閒

物類無可比奔車輪緩旋風遲曲終再拜謝天子天子
爲之微啓齒胡旋女出康居徙勞東來萬里餘中原自
有胡旋者關妙爭能爾不如天寶季年時欲變臣妾人
人學圓轉中有太真外祿山二人最道能胡旋梨花園
中冊作妃金雞障下養爲兒祿山胡旋迷君眼兵過黃
河疑未反貴妃胡旋惑君心死棄馬嵬念更深從茲地
軸天維轉五十年来制不禁胡旋女莫空舞數唱此歌

悟明主

新豐折臂翁 戒邊功也

新豐老翁八十八頭鬢眉鬚皆似雪玄孫扶向店前行
左臂憑肩右臂折問翁臂折來幾年兼問致折何因緣
翁云貫屬新豐縣生逢聖代無征戰慣聽梨園歌管聲
不識旗槍與弓箭無何天寶大徵兵戶有三丁點一丁
點得驅將何處去五月萬里雲南行聞道雲南有瀘水
椒花落時瘴煙起大軍徒涉水如湯未過十人二三死
村南村北哭聲哀兒別爺娘夫別妻皆云前後征蠻者

千萬人行無一迴是時翁年二十四兵部牒中有名字
夜深不敢使人知偷將大石鎚折臂張弓簸旗俱不堪
從茲始免征雲南骨碎筋傷非不苦且圖揀退歸鄉土
此臂折來六十年一肢雖廢一身全至今風雨陰寒夜
直到天明痛不眠痛不眠終不悔且喜老身今獨在不
然當時瀘水頭身死魂飛骨不收應作雲雨望鄉鬼萬
人塚上哭呦呦

雲南有萬人塚卽鮮于仲通
李宓曾覆軍之所今塚猶存

老人言君

聽取君不聞開元宰相宋開府不賞邊功防黷武

開元
初突

展數寇邊時天武軍牙將郝靈佺出使因引特勒迴鶻
部落斬突厥默啜獻首于闕下自謂有不世之功時宋
璟爲相以天子年少好武恐徵功者生心痛抑又不聞
其黨逾年始授卽將靈佺遂慟哭嘔血而死

天寶宰相楊國忠欲求恩幸立邊功邊功未立生人怨

請問新豐折臂翁

天寶末楊國忠爲相重構閣羅鳳之役募人討之前後二十餘萬衆發去

無返者又捉人連枷赴役天下怨哭人不聊生故祿山
得乘人心而盜天下元和初而折臂翁猶存因憐歌之

太行路 借夫婦以諷君臣之不終也

太行之路能摧車若比君心是坦途巫峽之水能覆舟
若比君心是安流君心好惡苦不常好生毛羽惡生瘡

與君結髮未五載豈期牛女爲參商古稱色衰相棄背
當時美人猶怨悔何況如今鸞鏡中妾顏未改君心改
爲君薰衣裳君聞蘭麝不馨香爲君盛容飾君看珠翠
無顏色行路難難重陳人生莫作婦人身百年苦樂由
他人行路難難於山險於水不獨人閒夫與妻近代君
臣亦如此君不見左納言右納史朝承恩暮賜死行路
難不在水不在山只在人情反覆閒

司天臺 引古以儆今也

司天臺仰觀俯察天人際義和死來職事廢官不求賢
空取藝昔聞西漢元成閒上陵下替謫見天北辰微闇
少光色四星煌煌如火赤耀芒動角射三台上台半滅
中台坼是時非無太史官眼見心知不敢言明朝趨入
明光殿唯奏慶雲壽星見天文時變兩如斯九重天子
不得知不得知安用臺高百尺爲

捕蝗 刺長吏也

捕蝗捕蝗誰家子天熱日長饑欲死興元兵後傷陰陽

和氣蠱蠹化爲蝗始自兩河及三輔荐食如飢飛似雨
雨飛蠶食千里間不見青苗空赤土河南長吏言憂農
課人晝夜捕蝗蟲是時粟斗錢三百蝗蟲之價與粟同
捕蝗捕蝗竟何利徒使饑人重勞費一蟲雖死百蟲來
豈將人力定天災我聞古之良吏有善政以政驅蝗蝗
出境又聞貞觀之初道欲昌文皇仰天吞一蝗一人有

慶兆民賴是歲雖蝗不爲害

貞觀二年太宗吞蝗
蟲事見貞觀實錄

昆明春水滿 思王澤之廣被也

貞元中
漲泛

昆明春昆明春池岸古春流新影浸南山青滉漾波
沉西日紅奩淪往年因旱靈池竭龜尾曳塗魚煦沫詔
開分水注恩波千介萬鱗同日活今來淨淥水照天游
魚鱖鰕蓮田田洲香杜若抽心短沙暖鴛鴦鋪翅眠動
植飛沉皆遂性皇澤如春無不被漁者仍豐網罟資貧
人久獲菰蒲利詔以昆明近帝城宦家不得收其征菰
蒲無租魚無稅近水之人感君惠感君惠獨何人吾聞
率土皆王民遠民何疎近何親願推此惠及天下無遠

無近同欣欣吳興山中罷擢茗鄱陽坑裏休封銀天涯
地角無禁利熙熙同似昆明春

城鹽州

美聖謨而誚邊將也

貞元歲壬申特詔城之

城鹽州城鹽州城在五原原上頭蕃東節度鉅闡布忽
見新城當要路金鳥飛傳贊普聞建牙傳箭集羣臣君
臣頽緡面有憂色皆言勿謂唐無人自築鹽州十餘載
左衽毳裘不犯塞晝牧牛羊夜捉生長去新城百里外
諸邊急警勞戍人唯此一道無煙塵靈夏潛安誰復辨

秦原閭通何處見廊州驛路好馬來長安樂肆黃著
賤城鹽州城鹽州未城天子憂德宗按圖自定計非關
將略與廟謀吾聞高宗中宗世北虜猖狂最難制韓公
創築受降城三城鼎峙屯漢兵東西亘絕數千里耳冷
不聞胡馬聲如今邊將非無策心笑韓公築城壁相看
養寇爲身謀各握強兵固恩澤願分今日邊將恩褒贈
韓公封子孫誰能將此鹽州曲翻作歌詞聞至尊

道州民 笑臣遇明主也

道州民多侏儒長者不過三尺餘市作矮奴年進送號
爲道州任土貢任土貢寧若斯不聞使人生別離老翁
哭孫母哭兒一自陽城來守郡不進矮奴頻詔問城云
臣按六典書任土貢有不貢無道州水土所生者只有
矮民無矮奴吾君感悟璽書下歲貢矮奴宜悉罷道州
民老者幼者何欣欣父子兄弟始相保從此得作良人
身道州民民到于今受其賜欲說使君先下淚仍恐兒
孫忘使君生男多以陽爲字

馴犀感爲政之難終也

貞元丙子歲南海進馴犀詔納苑中至十

三年冬大寒
馴犀死矣

馴犀馴犀通天犀軀貌駭人角駭雞海蠻聞有明天子
驅犀乘傳來萬里一朝得謁大明宮歡呼拜舞自論功
五年馴養始堪獻六譯語言方得通上嘉人獸俱來遠
蠻館四方犀入苑餽以瑤莠鑠以金故鄉迢遞君門深
海鳥不知鐘鼓樂池魚空結江湖心馴犀生處南方熱
秋無白露冬無雪一入上林三四年又逢今歲苦寒月

飲水臥霰苦蹉跎角骨凍傷鱗甲踣馴犀死蠻兒啼向
闕再三顏色低奏乞生歸本國去恐身凍死似馴犀君
不見建中初馴象生還放林邑建中元年詔盡出苑中馴象放歸南方也君
不見貞元末馴犀凍死蠻兒泣所嗟建中異貞元象生
犀死何足言

五絃彈 惡鄭之奪雅也

五絃彈五絃彈聽者傾耳心寥寥趙璧知君入骨愛五
絃一一爲君調第一第二絃索索秋風拂松疎韻落第

三第四絃泠泠夜鶴憶子籠中鳴第五絃聲最掩抑隴
水凍咽流不得五絃並奏君試聽淒淒切切復錚錚
擊珊瑚一兩曲水寫玉盤千萬聲殺聲入耳膚血寒慘
氣中人肌骨酸曲終聲盡欲半日四坐相對愁無言座
中有一遠方士唧唧咨咨聲不已自歎今朝初得聞始
知孤負平生耳唯憂趙璧白髮生老死人閒無此聲遠
方士爾聽五絃信爲美吾聞正始之音不如是正始之
音其若何朱絃疎越清廟歌一彈一唱再三歎曲淡節

稀聲不多融融曳曳召元氣聽之不覺心平和人情重
今多賤古古琴有絃人不撫更從趙壁藝成來二十五
絃不如五

蠻子朝 刺將驕而相備位也

蠻子朝汎皮船兮度繩橋來自舊韻州道路遙入界先
經蜀川過蜀將收功先表賀臣聞雲南六詔蠻東連牂
牁西連蕃六詔星居初鎖碎合爲一詔漸強大開元皇
帝雖聖神唯蠻倔強不來賓鮮于仲通六萬卒征蠻一

陣全軍沒至今西洱

音

二河岨邊箭孔刀痕滿枯骨

天寶十三

載鮮于仲通統兵六萬討雲南王閣羅鳳于西洱河全軍覆沒也

誰知今日慕華風不

勞一人蠻自通誠由陛下休明德亦賴微臣誘諭功德

宗省表知如此笑令中使迎蠻子蠻子導從者誰何摩

挲俗羽雙隈伽清平官持赤藤杖大將軍繫金呿

呿加

嗟

切邪

異年尋男尋閣勅特敕召對延英殿上心貴在

懷遠蠻引臨玉座近天顏冤旒不垂親勞徠賜衣賜食

移時對移時對不可得大臣相看有美色可憐宰相拖

紫佩金章朝日唯聞對一刻

騾國樂

欲王化之先邇後遠也

貞元十七年來獻之

騾國樂騾國樂出自大海西南角雍羌之子舒難陀來
獻南音奉正朔德宗立仗御紫庭黠纁不塞爲爾聽玉
螺一吹椎髻聳銅鼓一擊文身踊珠纓炫轉星宿搖花
鬘音慢髮飾也抖擻龍蛇動曲終王子啓聖人臣父願爲唐
外臣左右歡呼何翕習至尊德廣之所及須臾百辟詣
閤門俯伏拜表賀至尊伏見騾人獻新樂請書國史傳

子孫時有擊壤老農父暗測君心閒獨語聞君政化甚
聖明欲感人心致太平感人在近不在遠太平由實非
由聲觀身理國國可濟君如心兮民如體體生疾苦心
慘悽民得和平君愷悌貞元之民若未安騾樂雖聞君
不歡貞元之民苟無病騾樂不來君亦聖騾樂騾樂徒
喧喧不如聞此藟藟言

縛戎人 達窮民之情也

縛戎人縛戎人口穿面破驅入秦天子矜憐不忍殺詔

徙東南吳與越黃衣小使錄姓名領出長安乘遞行身
被金瘡面多瘡扶病徒行日一驛朝食飢渴費杯盤夜
臥腥臊汚牀席忽逢江水憶交河垂手齊聲嗚咽歌其
中一虜語諸虜爾苦非多我苦多同伴行人因借問欲
說喉中氣憤憤自云鄉管本涼原大歷年中沒落蕃一
落蕃中四十載身著皮裘繫毛帶唯許正朝服漢儀敝
衣整巾潛淚垂誓心密定歸鄉計不使蕃中妻子知

有李

如遇者蓬子將軍之子也嘗沒蕃中自云蕃法唯正歲
一日許唐人之沒蕃者服唐衣冠由是悲不自勝遂密

定歸計也

暗思自有殘筋骨更恐年衰歸不得蕃候嚴兵鳥

不飛脫身冒死奔逃歸晝伏宵行經大漠雲陰月黑風
沙惡驚藏青塚寒草疎偷度黃河夜水薄忽聞漢軍鼙
鼓聲路傍走出再拜迎游騎不聽能漢語將軍遂縛作
蕃生配向東南卑濕地定無存卹空防備念此吞聲仰
訴天若爲辛苦度殘年涼原鄉井不得見胡地妻兒虛
棄捐沒蕃被囚思漢土歸漢被劫爲蕃虜早知如此悔
歸來兩地寧如一處苦縛戎人戎人之中我苦辛自古

此寬應未有漢心漢語吐蕃身

白氏長慶集卷三